

Oqaasileriffik

Sprogsekretariatet

Nunat Aqqinik Aalajangiisartut
marlunngorneq oktobarip 25-anni 2016-imi
Ilimmarfimmi ataatsimiinnerat

Peqataasut.: Karl Elias Olsen, Kirstine Kreutzmann, Marianne Petersen, Bolatta Vahl, Jens Danielsen (oqarasuaatikkut malinnaavoq).

Allatsi: Lisathe Møller Kruse

Oqaluuserisat makkuupput:

1. Nuup qaqqaaasa ilaat Ukkusissat
2. Nunatta aqqa Kalaallit Nunaat Inuit Nunaanngussava? (Inatsisartunut ilaasortap inatsisartuni eqqartugassanngortitaa)
3. Nunat Aqqinik Aalajangiisartut siulittaasuata Karl Elias Olsenip Qallunaat Nunaannut nuuttussanngornerata kingunerisaanik siulittaasussamik qinersineq
4. Taasiariaqartut

Oqaasileriffik

Sprogsekretariatet

1. pillugu –

Nuup qaqaasa ilaat Nuup qinnguata kujatinnguaniittoq qaqqarujussuaq Ukkusissat inuinit assigiinngitsumik taagorneqarpoq, ilaatigut assortuussutaalluni. 1952-imi taamani Qallunaat Nunaanni inissisimasumi Stednavneudvalg for Grønlandimit qasseersiutitut akuerineqarsimavoq, taamanimiilli pisortatigoortumik allannguuteqarani akuerisatut ateqarluni Ukkusissat. Oqaasileriffimmut akerliulluni saaffiginnittoqarpoq ateqarnerarlugu Ukkusissaq, allatullu taagorneqarneranut akerliulluni Nuummiunullu suusupaginninnertut taallugu oqaatigalugu. Taamaariarmat tamanna pillugu sorlerlu eqqornersoq paaserusullugu misissuinerput aallartipparput. Aviisitoqqanit misissuinerit nuummiutoqqanillu apersuinerit ersersippaat pineqartut tamarmik Ukkusissat aamma Ukkusissat atorneqartut. Qulakkeerumallugu sorleq eqqortuunersoq paasissutissallu nalorninaallisinnngimmasuk sorleq eqqortuunersoq misissuineq ingerlaannassaaq, ilaatigut oqaluttuatoqaatitsinni taaneqarsimanersoq misissorneqassalluni.

2. pillugu –

Nunatta aqqa Kalaallit Nunaat Inuit Nunaangussanersoq inatsisartunut ilaasortap Nikolaj Jeremiassenip inatsisartut ataatsimiinnissaanni eqqartugassanngortitaa Oqaasileriffimmut Nunat Aqqinik Aalajangiisartunullu saaffiginnissutaavoq. Nunat Aqqinik Aalajangiisartunut ilaasortat isumaqatigiissutigivaat maannakkut aqqa Kalaallit Nunaat ateriinnassagaa, kalaaliugatta immikkuullarissutigalugulu naggueqatitsinnut allanut sanilliulluta. Inuit Nunaannik oqaraangatta naggueqatigiit tamarmik Siberiamit Kalaallit Nunaannut pineqartarmata taamatut Nunat Aqqinik Aalajangiisartunit ateqartikkusunneqanngilaq. Nunanut allanut aallaraangatta kalaaliunerartarpugut. Nunat Aqqinik Aalajangiisartunut ilaasortap avanersuarneersup Jens Danielsenip nassuiaatigivaa namminneq imminnut avanersuarmit inunnik taasaraluarlutik nunanut allanut aallaraangamik kalaaliunerartarlutik. Nunat Aqqinik Aalajangiisartut ilaasortat isumatigiillutik oqaatigivaat kalaaliuneq tulluusimaarutaasarmat Kalaallit Nunaat nunatta ateriinnartariaqaraa.

3. pillugu –

Nunat Aqqinik Aalajangiisartut siulittaasuat Karl Elias Olsen tunuarniuteqarnermini oqaaseqarpoq, Qallunaat Nunaannut nuuttussaagamik siulittaasutut tunuarniuteqarluni.

Oqaasileriffik Sprogsekretariatet

Nunat Aqqinik Aalajangiisartut siulittaasuata Karl Elias Olsenillu siulittaasutut tuniarniuteqarnera peqqutaalluni siulittaasussamik Nunat Aqqinik Aalajangiisartut qinersipput. Nunat Aqqinik Aalajangiisartut siulittaasussaattut **Kirstine Olsen** qinerneqarpoq, siulittaasut tullinngorlunilu **Karl Elias Olsen**. Karl Elias Olsenip Qallunaat Nunaanniikkaluarluni Nunat Aqqinik Aalajangiisartunut ilaasortaaginnarnissani kissaatigivaa, tamannalu ilaasortaqaqaanit tapersorsorneqarluarluni. Karl Elias Olsen siulittaasup tullissaattut piukkunneqarpoq, nunat aqqinik ilisimasaqarluarnera peqqutaasunut ilaalluni. Ilaasortat tamarmik isumaqatigiillutik Karl Elias Olsen Nunat Aqqinik Aalajangiisartut siulittaasup tullissaattut qinerpaat.

4. pillugu –

Taasariaqartuni NAA-mi ilaasortat ilaata apequtigivaa nunat aqqi GPS-niittut suminngaanneertarnersut, kukkunik kiisalu allattaasitoqqamik allatanik ilaqarmata. Nunat Aqqinik Aalajangiisartut allataata tamanna paasiniarniarpaat.

NAA-mi ilaasortat tulliani qaqugu ataatsimiissanerlutik aalajanginngikkallarpaat.

Karl Elias Olsen
Siulittaasoq

Kirstine Olsen
Siulittaasup tullia

Marianne Petersen
NAA-mi ilaasortaq

Jens Danielsen
NAA-mi ilaasortaq

Bolatta Vahl
NAA-mi ilaasortaq